

Жиззах вилояти прокуратурасига

Жиноят ишлари бўйича Жиззах вилояти судьяси Бобур Бобоевнинг 2014 йил 24 январда Зомин тумани жиноят ишлари бўйича суди 2014 йил 15 январда чиқарган қарорни ўзгаришсиз қолдириш тўғрисида чиқарган қароридан норози бўлиб, Зомин тумани жиноят ишлари бўйича суди томонидан 2014 йил 15 январда ҳуқуқбузар деб топилган Нурова Намуна Низомовна томонидан

АРИЗА

(Назорат тартибида протест келтириш тўғрисида)

2014 йил 10 январда Зомин туман ИИБ ходимлари жамоат жойларида ибодат либосида юрганлигимни иддао қилиб далолатнома расмийлаштирди.

2014 йил 15 январда № 00 сонли ишда жиноят ишлари бўйича Зомин туман суди Қ.Қозиев раислигида Зомин туман ички ишлар бўлимидан келиб тушган маъмурий ишни кўриб чиқиб, мени жамоат жойида ибодат либосида юрган деб топиб, Ўзбекистон Республикаси Маъмурий жавобгарлик тўғрисидаги кодекснинг 184<sup>1</sup>-моддасида назарда тутилган ҳуқуқбузарликни содир этган деб топди.

2014 йил 24 январда № 02 сонли ишда жиноят ишлари бўйича Жиззах вилояти судьяси Бобур Бобоев ишни кассация инстанциясида кўриб, жиноят ишлари бўйича Зомин туман суди 2014 йил 15 январда чиқарган қарорни ўзгаришсиз қолдирди.

Мен жиноят ишлари бўйича Жиззах вилояти судьяси Бобур Бобоевнинг қароридан ҳамда Зомин туман суди қарорининг мени ҳуқуқбузарлик содир қилган деган қисмидан қуйидаги сабабларга кўра норозиман.

1. Жиноят ишлари бўйича Зомин туман суди менинг ишимни ҳар томонлама, тўла ва объектив равишда кўриб чиқмади. Маъмурий жавобгарлик тўғрисидаги Кодекснинг 3-моддасида маъмурий жавобгарлик тўғрисидаги қонун ҳужжатлари қонунийлик, фуқароларнинг қонун олдида тенглиги, одиллик ва айб учун жавобгарликнинг муқаррарлиги каби тамойилларга асосланиши белгиланган. Мазкур Кодекснинг 269-моддасига биноан эса, маъмурий ҳуқуқбузарлик тўғрисидаги ишларни юритиш вазифаларига ишни ўз вақтида, ҳар томонлама, тўла ва объектив равишда кўриб чиқиш керади.

Суд мен кийган кийим нима сабабдан «ибодат либоси» ҳисобланишини ҳуқуқий жиҳатдан асослаб бермади. Кодекснинг 184<sup>1</sup>-моддаси асосида маъмурий жавобгарликка тортиш учун суд «ибодат либоси» тушунчасига таъриф бериши ва менинг кийимим нима сабабдан «ибодат либоси» ҳисобланишини кўрсатиб бериши керак эди.

Суд тегишли эксперт ёки мутахассислар хулосасини эътиборга олиб қарор чиқариши лозим эди.

Юқоридаги сабабларга кўра, ушбу қарор асоссиз деб топилиб, Ўзбекистон Республикаси Маъмурий жавобгарлик тўғрисидаги Кодексининг 321-моддасига асосан бекор қилиниши керак деб ҳисоблайман.

2. Ўзбекистон Республикаси Вазирлар Маҳкамаси ҳузуридаги Диний ишлар бўйича қўмита жамоат жойларида ҳижоб билан юриш ҳақида фуқаролардан тушган саволларга, «Ислом шариатида «махсус диний либос», «ибодат кийими» деган тушунча мавжуд эмас», «Диний қоидалар беркитишни талаб қилган аъзоларни ёпиб турувчи кийимни шахс барча ҳолатларда, жумладан ибодат пайтидан ҳам кийиши мумкин», деб тушунтириш берган.
3. Диний эътиқодга кўра кийиниш ҳар бир кишидаги мавжуд виждон эркинлигининг ажралмас қисмидир. Ҳижоб мусулмон аёллар учун номаҳрам эркаклар ҳузурида доимо кийиш лозим бўлган либос ҳисобланади<sup>1</sup>. У фақат ибодат пайти кийиладиган кийим бўлмай, балки мусулмон аёл учун диний амалларнинг ажралмас бир қисмидир<sup>2</sup>. Ислом дини қоидалари талаб қиладиган, аёллар учун номаҳрам эркаклардан тўсиш лозим бўлган аъзоларни ёпиб турувчи кийим кийиш менинг виждон эркинлигим, конституциявий ҳуқуқимдир.
4. Виждон эркинлиги Ўзбекистон Республикаси Конституциясининг 31-моддасида, «Виждон эркинлиги ва диний ташкилотлар тўғрисида»ги қонуннинг 3-моддасида кафолатланган. Ўзбекистон Республикаси Конституцияси Ўзбекистон ҳудудида Конституция ва қонунларнинг сўзсиз тан олинишини мустаҳкамлайди. Қолаверса, Конституциянинг 16-моддаси бирорта ҳам қонун ёки норматив ҳужжат Конституция нормалари ва қоидаларига зид келиши мумкин эмаслигини белгилаган.

Юқоридагилардан келиб чиққан ҳолда ҳамда Маъмурий Жавобгарлик тўғрисидаги Кодекснинг 323-моддасига асосан,

Сўрайман:

Жиноят ишлари бўйича Жиззах вилояти судьяси Бобур Бобоевнинг 2014 йил 24 январда чиқарган қарорига нисбатан Жиззах вилоят жиноят ишлари бўйича суди Раёсатига назорат тартибида протест киритишингизни.

Илова:

1. Жиноят ишлари бўйича Зомин туман судининг 2014 йил 15 январдаги қарори,
2. Жиноят ишлари бўйича Жиззах вилоят суди судьяси Бобур Бобоевнинг 2014 йил 24 январда чиқарган қарори.
3. Ўзбекистон Республикаси Вазирлар Маҳкамаси ҳузуридаги Диний ишлар бўйича қўмитанинг «ибодат либоси»га тушунтириш берган ҳолда менга йўллаган мактуби (агар шундай мактуб олган бўлсангиз).

---

<sup>1</sup> Ислом энциклопедияси. Зухриддин Ҳусниддинов таҳрири остида, Тошкент, 2004 йил.

<sup>2</sup> Шайх Муҳаммад Содиқ Муҳаммад Юсуф. www.islom.uz, Зикр аҳлидан сўранг.

<http://islom.uz/savollar/smf/index.php?topic=24693.0>

2014 йил 26 январь

Н. Нурова

(Имзо)